

Maannakkut ineqarnermut tapit pillugit malittarisassani isertitat tunngaviusarneri pingitsoorani ilumut inunnut aningaasatigut pisariaqartitsinerpaaginnarnut atuunnersut pillugit allaaserinninnertalimmik misissuinnertalimmillu UKA 2019-imi nassuiaammik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Aamma ilanngunneqassaaq init ataasiakkaat ingerlanneqarnerannut aningaasartuutit piviusut aqqissuussinerup qularnaartarnerai. Akileraartarnermut Atugarissaarnermullu Ataatsimiititaliap ineqarnermut tapiisarnermut tunngatillugu sunniivigeqatigiittarnermi ajornartorsiutaasartut pillugit allaaserisai pillugit ataatsimoortumik aqqiiviginiarlugit tigussaasumik siunnersuutit innersuussinerillu nassuiaammi aamma ilanngunneqassapput.

(Inatsisartuni ilaasorta, Tillie Martinussen, Suleqatigiissitsisut)

Akissuteqaat

(Isumaginninnermut Inatsisinillu Atuutsitsinermit Naalakkersuisoq)

Aappassaaneerinnineq

Sanaartornermut Ataatsimiititaliap Inatsisartut aalajangiiffigisassaattut siunnersuut saqqummiunneqartoq pillugu isumaliutissiissuteqarsimavoq. Naalakkersuisut Sanaartornermut Ataatsimiititaliap peqqissaartumik suliaqarsimanerat pillugu qutsavigaat.

Isumaliutissiissummi ataatsimiititaliap ineqarnermut suliassaqarfimmi ajornartorsiutit, oqartussaarfiiit assigiinnigitsunik suliallit akornanni ajornartorsiutinut tunngasut arlallit, aningaasaqarnermut, ineqarnermut aamma isumaginninnermut suliassaqarfinnut tunngassuteqartut eqqartorpaat.

Naalakkersuisut ajornartorsiutit tamakkua Naalakkersuisoqarfiit, oqartussat suliniaqatigiiffiillu attuumassuteqartut suleqatigalugit suliarineqartariaqartut qulaajarneqartariaqartullu pillugit ataatsimiititaliap isumaqatigaat.

Naalakkersuisut aalajangiiffigisassatut siunnersuut pillugu ataatsimiititaliap isumaliutissiissutaa aamma inassuteqaatai tusaatissatut tiguaat aamma ineqarnermut isumaginninnermullu suliassaqarfinni piffissami aggersumi aqqissuusseqqinnissami ataatsimiititaliap isummersuutai ingerlateqqillugit suliarissavai, matumani attartortitsisarneq pillugu inatsimmik aqqissuusseqqinnissap piareersarneqarneranut tunngatillugu taakkua ilaatinneqassasut naatsorsuutigineqarpoq.

